



Općina Stari Grad Sarajevo
Općinski Načelnik

Municipality of Stari Grad Sarajevo
Municipality Mayor

Broj: 01-04-4-1632/25

Datum: 17.06.2025. godine

Na osnovu člana 85. Statuta Općine Stari Grad Sarajevo („Službene novine Kantona Sarajevo“, broj: 20/24), Općinski načelnik Općine Stari Grad Sarajevo, donosi

ZAKLJUČAK

1. Predlaže se Nacrt Odluke o visini komunalnih taksi Općine Stari Grad Sarajevo.
2. Predlaže se Općinskom vijeću Stari Grad Sarajevo da razmotri i utvrdi Nacrt Odluke o visini komunalnih taksi Općine Stari Grad Sarajevo.

**SEKRETAR OPĆINSKOG
ORGANA UPRAVE**

Adela Plakalo,s.r.

OPĆINSKI NAČELNIK

Irfan Čengić,s.r.

Dostaviti:

1. Općinskom vijeću Stari Grad Sarajevo;
2. Evidencija;





Na osnovu člana 6. Zakona o komunalnim taksama („Službene novine Kantona Sarajevo“, broj: 8/22), člana 13. stav (2) Zakona o principima lokalne samouprave u Federaciji Bosne i Hercegovine („Službene novine FBiH“, broj: 49/06 i 51/09) i člana 26. Statuta Općine Stari Grad Sarajevo („Službene novine Kantona Sarajevo“, broj: 20/24), Općinsko vijeće Stari Grad Sarajevo, na 8. redovnoj sjednici, održanoj dana _____2025. godine, donijelo je

N A C R T

O D L U K U

O VISINI KOMUNALNIH TAKSI OPĆINE STARI GRAD SARAJEVO

I. OPĆE ODREDBE

Član 1. **(Predmet)**

Ovom odlukom propisuje se način utvrđivanja kriterija i visina komunalne takse, vrsta, rokovi, način plaćanja i oslobađanja od plaćanja takse te otpis i povrat takse, na području Općine Stari Grad Sarajevo (u daljem tekstu: Općina).

Član 2. **(Definicije pojmova)**

Definicije pojmova u smislu ove Odluke su:

- a) Sredstva za igru i igre na sreću podrazumijevaju svaki uređaj kojim se naplaćuje provedeno vrijeme jednog ili više konzumenata takvih uređaja (bilijar, automati, fliperi, video igre, pikado i aparati za posebne igre na sreću i sl.);
- b) Poslovni prostor u kojem se priređuju klasične igre na sreću i posebne igre na sreću podrazumijeva svaki poslovni prostor kojem se priređuju klasične igre na sreću i/ili posebne igre na sreću definisane odredbama Zakona o igrama na sreću („Službene novine Federacije BiH“, br. 48/15 i 60/15) i njegovim eventualnim izmjenama i dopunama;
- c) Držanje i izvođenje muzike uživo u ugostiteljskim objektima podrazumijeva povremenu ili svakodnevnu organizaciju izvođenja muzičkog programa (muzike uživo) uz pružanje ugostiteljskih usluga;
- d) Isticanje objava, oglasa i saopćenja na javnim mjestima podrazumijeva postavljanje stalnih ili privremenih objava, oglasa, i saopćenja na javnim mjestima u štampanoj ili elektronskoj formi (baneri, plakati, panoji i sl.), što podrazumijeva i reklamiranje brendova, proizvoda ili usluga koje pružaju pravna ili fizička lica ili koje imaju svrhu putokaza prema mjestu sjedišta sponzora koji ih je postavio.

- e) Korištenje prostora na javnim mjestima za kampove (šatore, prikolice i motorna vozila svih kategorija) podrazumijeva zauzimanje prostora za privremeni boravak od strane jedne ili više osoba;
- f) Postavljanje uređaja za isplatu i naplatu gotovine (bankomata) podrazumijeva svako zauzimanje površine radi postavljanja i instaliranja ovakvih uređaja u svrhu pružanja usluga prema konzumentima;
- g) Postavljanje svih drugih uređaja koji putem automatske obrade podataka naplaćuju usluge gotovinom, karticama za naplatu ili posredstvom telekom operatera (kafemati, parkomati i sl.) podrazumijeva postavljanje navedenih uređajakoji automatskom obradom podataka obračunavaju i naplaćuju razne vrste usluga bez osobnog posredovanja konzumenta sa pružaocem usluga, koji može biti registrovan kao fizičko ili pravno lice.

Član 3. **(Vrste taksi)**

Takse se naplaćaju za:

- a) Držanje sredstava za igru i igre na sreću (bilijar, automati, fliperi, video igre, pikado i aparati za posebne igre na sreću);
- b) Poslovni prostor u kojem se priređuju klasične igre na sreću i posebne igre na sreću koje su definisane odredbama Zakona o igrama na sreću („Službene novine Federacije BiH“, br. 48/15 i 60/15) i njegovim eventualnim izmjenama i dopunama;
- c) Držanje i izvođenje muzike uživo u ugostiteljskim objektima;
- d) Isticanje objava, oglasa i saopćenja na javnim mjestima;
- e) Korištenje prostora na javnim mjestima za kampove (šatore, prikolice i motorna vozila svih kategorija);
- f) Postavljanje uređaja za isplatu i naplatu gotovine (bankomata) i
- g) Postavljanje svih drugih uređaja koji putem automatske obrade podataka naplaćuju usluge gotovinom, karticama za naplatu ili posredstvom telekom operatera (kafemati, parkomati i sl.).

Član 4. **(Obveznik plaćanja takse)**

- (1) Takseni obveznici su lica koja su korisnici prava na postavljanje, držanje i korištenje uređaja, predmeta i dr. ili prava na korištenje prostora na području Općine, a za čije postavljanje, držanje i korištenje je propisano plaćanje takse ovom Odlukom.
- (2) Ako za istu taksu postoje dva ili više obveznika, njihova obaveza je solidarna.
- (3) Taksena obaveza nastaje danom početka korištenja prava iz stava (1) ovog člana.

Član 5. **(Pripadnost i uplata takse)**

- (1) Takse su prihod Općine i Grada Sarajevo.
- (2) Prihodi ostvareni plaćanjem taksi propisanih ovom odlukom raspodjeljuju se u omjerima Općina Stari Grad Sarajevo 90% i Grad Sarajevo 10%, a što će se regulisati posebnim

sporazumom, koji u ime Općine zaključuje Općinski načelnik sa drugom sporazumnom stranom.

- (3) Takse se uplaćuju na depozitni račun Općine otvoren kod banke.
- (4) U nalogu za plaćanje takse obavezno se upisuje poziv na broj 722321-općinske komunalne takse.

II. TARIFA KOMUNALNIH TAKSI

Član 6. (Tarifa broj 1.)

- (1) Tarifnim brojem 1. utvrđuje se visina komunalne takse za držanje sredstava za igru i igre na sreću (bilijar, automati, fliperi, video igre, pikado i aparati za posebne igre na sreću).
- (2) Komunalna taksa iz stava (1) ovog člana, plaća se godišnje po jednom sredstvu i to kako slijedi:
- a) bilijar stolovi, automati, fliperi, video igre, pikada i druga sredstva
za igre gdje je dobitak isključivo u određenom broju igara 1.600,00 KM
- b) aparati koji donose novac 6.000,00 KM
- (3) Pod aparatima koji donose novac podrazumijevaju se elektronski ili mehanički aparati koji tokom igre omogućuju igraču dobitak u novcu ili žetonima koji su naplativi u novcu.

Član 7. (Tarifa broj 2.)

- (1) Tarifnim brojem 2. utvrđuje se visina komunalne takse za poslovne prostore u kojima se priređuju klasične igre na sreću i posebne igre na sreću koje su definisane odredbama Zakona o igrama na sreću („Službene novine Federacije BiH“, br. 48/15 i 60/15) i njegovim eventualnim izmjenama i dopunama.
- (2) Visina takse iz stava (1) ovog člana utvrđuje se po kategorijama ulica na području Općine, u kojima se mogu obavljati poslovne djelatnosti, a u skladu sa pozitivnim propisima kojima se reguliše raspored poslovnih djelatnosti na području Općine.
- (3) Komunalna taksa iz stava (1) ovog člana plaća se godišnje, za svaki poslovni prostor i to kako slijedi:

Poslovni prostor u kojem se priređuju klasične igre na sreću i posebne igre na sreću	A kategorija	B kategorija	C kategorija	D kategorija	E kategorija
Iznos takse u KM:	30.000,00	28.000,00	26.000,00	25.000,00	23.000,00

Član 8.
(Tarifa broj 3.)

- (1) Tarifnim brojem 3. utvrđuje se visina komunalne takse za držanje i izvođenje muzike uživo u ugostiteljskim objektima.
- (2) Komunalna taksa iz stava (1) ovog člana, plaća se dnevno u iznosu od 100,00 KM.

Član 9.
(Tarifa broj 4.)

- (1) Tarifnim brojem 4. utvrđuje se visina komunalne takse za isticanje objava, oglasa i saopćenja na javnim mjestima određenim za te namjene.
- (2) Za isticanje banera, plakata, oglasa i drugih sličnih saopćenja na javnim mjestima određenim za te namjene, plaća se jednokratna taksa u iznosu od 3,00 KM dnevno, srazmjerno broju dana isticanja istih, a što se utvrđuje na osnovu rješenja/ugovora kojim je odobreno njihovo isticanje.
- (3) Za isticanje panoa, displeja i sl., plaća se godišnja komunalna taksa, u iznosu od 100,00 KM po 1,00 m², a što se utvrđuje na osnovu rješenja/ugovora kojim je odobreno njihovo isticanje.

Član 10.
(Tarifa broj 5.)

- (1) Tarifnim brojem 5. utvrđuje se visina komunalne takse za korištenje prostora na javnim mjestima za kampove (šatore, prikolice, motorna vozila svih kategorija), deponije materijala i drugu privremenu upotrebu.
- (2) Komunalna taksa iz stava (1) ovog člana, plaća se dnevno za:
 - a) svaki šator 2,00 KM
 - b) kamp prikolica 1,00 KM
 - c) motorna vozila svih kategorija 1,00 KM

Član 11.
(Tarifa broj 6.)

- (1) Tarifnim brojem 6. utvrđuje se visina komunalne takse za postavljanje uređaja za isplatu i naplatu gotovine (bankomata i sl.).
- (2) Komunalna taksa iz stava (1) ovog člana, plaća se godišnje po jednom uređaju u iznosu od 2.000,00 KM.

Član 12.
(Tarifa broj 7.)

- (3) Tarifnim brojem 7. utvrđuje se visina komunalne takse za postavljanje uređaja koji putem automatske obrade podataka naplaćuju usluge gotovinom, karticama za naplatu ili posredstvom telekom operatera (kafemati, parkomati i sl.).

- (4) Komunalna taksa iz stava (1) ovog člana, plaća se godišnje po jednom uređaju u iznosu od 500,00 KM.

III. OSLOBAĐANJE OD PLAĆANJA I OTPIS TAKSE

Član 13. (Oslobađanje od plaćanja takse)

- (1) Od plaćanja takse oslobođeni su:
- a) institucije Bosne i Hercegovine,
 - b) organi, organizacije i javne ustanove Federacije Bosne i Hercegovine, Kantona, općina sa područja Kantona Sarajevo i Grada Sarajeva,
 - c) humanitarne i dobrotvorne organizacije iz osnovne djelatnosti,
 - d) udruženja koja ne obavljaju privrednu djelatnost,
 - e) vojni invalidi od plaćanja takse iz člana 2. stav (1) tačka e) ove Odluke,
 - f) lica kojima je rješenjem nadležnog organa priznato svojstvo člana porodice poginulih, umrlih, nestalih i zarobljenih boraca, ratnih vojnih invalida i civilne žrtve rata,
 - g) privredna društva za zapošljavanje lica sa invaliditetom i zaštitna radionica,
 - h) javno preduzeće čiji je osnivač Općina.

Član 14. (Zahtjev za oslobađanje od plaćanja takse)

Zahtjev za oslobađanje od plaćanja takse podnosi se Poreznoj upravi Federacije Bosne i Hercegovine – Kantonalni porezni ured Sarajevo – Porezna ispostava Stari Grad (u daljem tekstu: Porezna uprava).

Član 15. (Otpis takse)

- (1) U slučaju smrti taksenog obveznika fizičkog lica i trajnog prestanka obavljanja registrovane djelatnosti iza kojeg nije ostala pokretna i nepokretna imovina iz koje bi se mogla naplatiti taksa, Općinsko vijeće Stari Grad Sarajevo (u daljem tekstu: Općinsko vijeće) na prijedlog Općinskog načelnika Općine Stari Grad Sarajevo (u daljem tekstu: Općinski načelnik) otpisuje taksu.
- (2) Zahtjev za otpis takse Općini podnosi nasljednik taksenog obveznika.

IV. NAČIN PRIJAVE I NAPLATE TAKSE

Član 16. (Prijava za razrez takse)

Takseni obveznici dužni su Poreznoj upravi podnijeti prijavu za razrez takse te istu platiti na način i u rokovima propisanim odredbama Zakona o komunalnim taksama („Službene novine Kantona Sarajevo“, broj: 8/22).

Član 17.
(Provođenje postupka naplate takse)

- (1) Ukoliko takseni obveznik u propisanom roku ne uplati taksu, Porezna uprava će u skladu sa Zakonom o poreznoj upravi Federacije Bosne i Hercegovine („Službene novine Federacije BiH“, broj: 33/02, 28/04, 57/09, 40/10, 27/12, 7/13, 71/14 i 91/15) po službenoj dužnosti provesti postupak naplate takse.
- (2) Porezna uprava je dužna Općini dostavljati izvještaj o uplati taksenih obaveza i to dva puta godišnje, za prvu polovinu tekuće godine do 31.07. i za drugu polovinu tekuće godine do 31.01. naredne godine.

V. POVRAT TAKSE

Član 18.
(Povrat pogrešno ili više uplaćene takse)

- (1) Obveznik od kojeg je taksa i kamata naplaćena, a koju nije bio dužan platiti ili je više uplatio, ima pravo na povrat.
- (2) Zahtjev za povrat se podnosi Poreznoj upravi koja je nadležna za utvrđivanje takse.
- (3) Porezna uprava je dužna da u roku od 20 (dvadeset) dana odluči o zahtjevu.

Član 19.
(Primjena drugih propisa)

U dijelu razreza takse, naplate, zastare, povrata, kamata i ostalih poslova vezanih za taksu koji nisu regulisani Zakonom o komunalnim taksama („Službene novine Kantona Sarajevo“, broj: 8/22) i ovom Odlukom, primjenjivat će se odredbe Zakona o Poreznoj upravi Federacije Bosne i Hercegovine („Službene novine Federacije BiH“, br. 33/02, 28/04, 57/09, 40/10, 27/12, 7/13, 71/14 i 91/15) i Zakona o upravnom postupku („Službene novine Federacije BiH“, br. 2/98 i 48/99).

VI. NADZOR I PROVOĐENJE

Član 20.
(Nadzor i kontrola)

- (1) Nadzor i kontrolu prijava, obračuna i plaćanja komunalne takse vrši Porezna uprava u saradnji sa Službom za privredu, Službom za inspekcijske poslove Općine i Službom za finansije i budžet Općine.
- (2) Služba za privredu, Služba za inspekcijske poslove i Služba za finansije Općine će vršiti redovne kontrole prijava taksenih obveznika i usklađenosti podataka za Poreznom upravom, svaka u okviru svojih nadležnosti.

- (3) Služba za finansije Općine je dužna da redovno dostavlja evidenciju uplata po osnovu komunalne takse Službi za privredu.

Član 21.
(Provođenje)

Za provođenje ove Odluke zadužuje se Porezna uprava.

VII. PRELAZNE I ZAVRŠNE ODREDBE

Član 22.
(Taksene obaveze do stupanja na snagu ove Odluke)

Taksene obaveze koje su nastale do dana stupanja na snagu ove Odluke, izvršit će se u skladu sa odredbama Odluke o visini komunalnih taksi („Službene novine Kantona Sarajevo“, broj: 15/22, 19/22 i 1/24), koje su važile u momentu nastanka taksene obaveze, pod uslovom da iste nisu u suprotnosti sa odlukama Ustavnog suda Federacije Bosne i Hercegovine.

Član 23.
(Prestanak važenja ranijeg propisa)

Danom stupanja na snagu ove Odluke, prestaje da važi Odluka o visini komunalnih taksi („Službene novine Kantona Sarajevo“, broj: 15/22, 19/22 i 1/24).

Član 24.
(Stupanje na snagu)

Ova Odluka stupa na snagu osmi dan od dana objave u „Službenim novinama Kantona Sarajevo“.

PREDSJEDAVAJUĆI
OPĆINSKOG VIJEĆA STARI GRAD
SARAJEVO

Seid Škaljić

Broj: 02-45-_____/25
Sarajevo, juni 2025. godine

O B R A Z L O Ž E N J E

PRAVNI OSNOV

Pravni osnov za donošenje Odluke o visini komunalnih taksi Općine Stari Grad Sarajevo sadržan je u članu 6. Zakona o komunalnim taksama („Službene novine Kantona Sarajevo“, broj: 8/22), kojim je utvrđeno da će Općinsko vijeće svojom odlukom utvrditi kriterije i visinu takse za obveznike koji su registrovani i/ili posluju na području općine, te da će se istom odlukom utvrditi vrsta, rokovi, način plaćanja i oslobađanja od plaćanja takse.

Odredbama člana 13. stav (2) Zakona o principima lokalne samouprave u Federaciji Bosne i Hercegovine („Službene novine FBiH“, broj: 49/06 i 51/09) i člana 26. Statuta Općine Stari Grad Sarajevo („Službene novine Kantona Sarajevo“, broj: 20/24), utvrđene su nadležnosti Općinskog vijeća za donošenje ove Odluke.

RAZLOZI ZA DONOŠENJE ODLUKE

Obaveza plaćanja komunalne takse u Kantonu Sarajevo utvrđena je Zakonom o komunalnim taksama („Službene novine Kantona Sarajevo“, broj: 8/22). Članom 6. navedenog Zakona utvrđeno je da će Općinsko vijeće svojom odlukom utvrditi kriterije i visinu takse za obveznike koji su registrovani i/ili posluju na području općine, te da će se istom odlukom utvrditi vrsta, rokovi, način plaćanja i oslobađanja od plaćanja takse.

Na osnovu citiranog člana Zakona, Općinsko vijeće Stari Grad Sarajevo je donijelo Odluku o visini komunalnih taksi Općine Stari Grad Sarajevo („Službene novine Kantona Sarajevo“ broj: 15/22, 19/22 i 1/24), kojom su regulisani način utvrđivanja kriterija i visina komunalne takse, vrsta, rokovi, način plaćanja i oslobađanja od plaćanja takse te otpis i povrat takse, na području Općine Stari Grad Sarajevo.

Ustavni sud Federacije Bosne i Hercegovine je, na sjednici održanoj dana 09.04.2025. godine, a odlučujući o zahtjevu zamjenika Premijera Federacije Bosne i Hercegovine Tonija Kraljevića, za davanje Mišljenja u vezi sa primjenom stavova Ustavnog suda Federacije Bosne i Hercegovine utvrđenih u presudama tog suda u odnosu na komunalne takse/naknade na istaknutu firmu, u smislu člana IV.B.3.7.d. (III) Ustava Federacije Bosne i Hercegovine, donio Mišljenje, broj: U-6/25 od 09.04.2025. godine, koje je dana 07.05.2025. godine, objavljeno u „Službenim novinama Federacije BiH“, broj: 33/25.

U izreci naprijed navedenog Mišljenja je, između ostalog, utvrđeno da, u skladu sa konačnim i obavezujućim odlukama Ustavnog suda Federacije Bosne i Hercegovine, obaveza plaćanja komunalne takse/naknade na istaknutu firmu nije u skladu sa Ustavom Federacije Bosne i Hercegovine te da su, shodno tome, od dana objave ovog Mišljenja u „Službenim novinama Federacije BiH“, kantonalne skupštine, gradska i općinska vijeća na teritoriji Federacije BiH, koja propisuju obavezu plaćanja komunalne takse/naknade za isticanje firme, dužni postupiti u skladu sa ovim Mišljenjem, odnosno u razumnom roku iz svojih propisa ukloniti odredbe kojima se propisuje navedena komunalna taksa/naknada i utvrđuje obaveza plaćanja iste, a što se jednako odnosi i na propise koji nisu bili predmet ocjene ustavnosti.

U skladu sa navedenim Mišljenjem Ustavnog suda Federacije Bosne i Hercegovine, od dana objave istog u „Službenim novinama Federacije BiH“, prestala je primjena svih odredbi Odluke o visini komunalnih taksi Općine Stari Grad Sarajevo („Službene novine Kantona Sarajevo“ broj: 15/22, 19/22 i 1/24), kojima je regulisana komunalna taksa na istaknutu firmu, a čije provođenje je u isključivoj nadležnosti Porezne uprave Federacije BiH-Kantonalnog poreznog ureda Sarajevo-Porezna ispostava Stari Grad, dok je ovom organu utvrđena obaveza da, u razumnom roku, navedene odredbe ukloni iz pomenute Odluke.

Postupajući po navedenom Mišljenju Ustavnog suda Federacije Bosne i Hercegovine, a uzimajući u obzir činjenicu da Odlukom o visini komunalnih taksi Općine Stari Grad Sarajevo („Službene novine Kantona Sarajevo“ broj: 15/22, 19/22 i 1/24) nije regulisana samo komunalna taksa na istaknutu firmu, za koju je Ustavni sud FBiH utvrdio da nije u skladu sa Ustavom FBiH, već i druge vrste komunalnih taksi propisanih Zakonom o komunalnim taksama Kantona Sarajevo, a koje nisu bile predmet ocjene ustavnosti, odnosno nisu obuhvaćene Mišljenjem Ustavnog suda FBiH, broj: U-6/25 od 09.04.2025. godine, Općinski načelnik je, putem nadležne Službe za privredu Općine Stari Grad Sarajevo, poduzeo aktivnosti na izmjeni navedene Odluke na način da se u istoj brišu ili mijenjaju sve odredbe koje se odnose na komunalnu taksu na istaknutu firmu.

O svemu naprijed navedenom, Općinski načelnik je, putem nadležne općinske službe, informisao Općinsko vijeće Stari Grad Sarajevo, na 7. redovnoj sjednici, održanoj dana 29.05.2025. godine, dostavljajući pismenu Informaciju o istom.

Cijeneći naprijed navedenu Informaciju, Općinsko vijeće je, na prijedlog predsjedavajućeg i zamjenika predsjedavajućeg Općinskog vijeća, predsjednika klubova vijećnika SDP, DF, NiP, NS i vijećnika Arnautović Merime i Čengić Alena, usvojilo zaključak, broj: 02-45-371/25 od 29.05.2025. godine, kojim se zadužuje Služba za privredu da za 8. redovnu sjednicu Općinskog vijeća Stari Grad Sarajevo pripremi izmjene i dopune Odluke o visini komunalnih taksi Općine Stari Grad Sarajevo („Službene novine Kantona Sarajevo“ broj: 15/22, 19/22 i 1/24), na način da se odredbe iste usklade sa Mišljenjem Ustavnog suda Federacije BiH („Službene novine Federacije BiH“, broj: 33/25).

Nadalje, Služba za privredu je, dana 09.06.2025. godine, zaprimila inicijativu vijećnika Išerić Saliha, kojom se predlaže da se visina komunalne takse za poslovne prostore u kojima se priređuju klasične igre na sreću i posebne igre na sreću koje su definisane odredbama Zakona o igrama na sreću utvrdi na drugačiji način (prema kategorijama ulica) i u većem iznosu u odnosu na važeće odredbe, a koji prijedlog je prihvaćen od strane predlagачa te inkorporiran u odredbe člana 7. ovog Nacrta Odluke, kao i da se visina komunalne takse za držanje sredstava za igru i igre na sreću (bilijar, automati, fliperi, video igre, pikado i aparati za posebne igre na sreću) poveća za 100 % u odnosu na dosadašnji iznos, a što je, također, ocijenjeno opravdanim te ugrađeno u odredbe člana 6. ovog Nacrta Odluke. Predlagач nije prihvatio dio predložene inicijative kojim se traži da se za sve poslovne prostore u kojima se priređuju klasične igre na sreću i posebne igre na sreću koje su definisane odredbama Zakona o igrama na sreću, a koji se suprotno odredbama navedenog Zakona i Odluke o dodjeli u zakup poslovnih zgrada i poslovnih prostora Općine Stari Grad Sarajevo i rasporedu poslovnih djelatnosti na području Općine Stari Grad Sarajevo („Službene novine Kantona Sarajevo“, broj: 2/20 – prečišćeni tekst, 7/23, 21/23, 19/24, 32/24 i 2/25), nalaze na manjoj udaljenosti od 100 m od vjerskih objekata i odgojno-obrazovnih

ustanova, uveća za 50 %, iz razloga jer se radi o zakonskoj odredbi koja je neprecizna i ostavlja prostor za različita pravna tumačenja, a samim tim i osnov za eventualno preispitivanje odredaba ove Odluke, posebno uzimajući u obzir ranije pribavljeno tumačenje i mišljenje nadležnog Federalnog ministarstva finansija, prema kojem se navedena odredba ne primjenjuje na privredne subjekte osnovane prije stupanja na snagu navedene odredbe.

Uzimajući u obzir sve naprijed navedeno, kao i obim izmjena koje bi postojeća Odluka pretrpila kako bi se ista uskladila sa Mišljenjem Ustavnog suda Federacije BiH, a istovremeno uvažili i prijedlozi iz dostavljene vijećničke inicijative te radi lakše primjene iste, predlagač se opredijelio da pristupi izradi Nacrta nove Odluke o visini komunalnih taksi Općine Stari Grad Sarajevo, ostavljajući mogućnost svim zainteresiranim subjektima da kroz postupak Javne rasprave, uzmu učešće u regulisanju predmetne oblasti na što kvalitetniji način te Općinskom vijeću Stari Grad Sarajevo predlaže da utvrdi isti.

FINANSIJSKA SREDSTVA

Za provođenje ove Odluke nisu potrebna dodatna finansijska sredstva u Budžetu Općine Stari Grad Sarajevo.

STRUČNA OBRADA:
Služba za privredu

PREDLAGAČ:
Općinski načelnik
putem Službe za privredu